

色矣。

三诊 二进加味大黄牡丹汤，肠中宿垢渐稀，唯脐右斜下近少腹处，按之尚痛，则病根尚未尽去也。仍用前法，减硝黄以和之。

粉丹皮一两	冬瓜子一两	生苡仁一两
桃仁泥五钱	败酱草五钱	京赤芍六钱
生甘草二钱	当归五钱	桔梗三钱

杜赤豆四两，煎汤代水。

姜佐景按：史君服此凡六剂，所下之物渐由咖啡色转为绿色，而绿色之中更杂有如蚕砂之黑粒，少腹痛处较瘥，唯上行之筋反觉微微牵引不舒。六剂之后，停药二日，乃行四诊。

四诊 肠痛近已就痊，唯每日晨起大便，患处尚觉胀满，恐系夙根未除。然下经多次，血分大亏，时时头晕，脉大，虚象也。当以补正主治，佐以利下焦水道。

大川芎一两	全当归五钱	大熟地四钱
春砂仁一钱	赤白芍各三钱	猪苓三钱
明天麻四钱	陈皮三钱	泽泻二钱
生白术五钱	冬葵子五钱	

姜佐景按：史君服此补正分利之剂后，前之大便时痛者，今已不痛矣，且其前色绿者，今亦转黄矣，唯七分黄之中仍有三分绿耳。史君前有遗精宿恙，此时又发。或系本方分利药太重之故欤？唯遗后绝不疲劳，则亦无妨焉。

陆左

初诊 痛在脐右斜下一寸，西医所谓盲肠炎也，脉大而实，当下之，用仲景法。

生大黄五钱	芒硝三钱	桃仁五钱
冬瓜仁一两	丹皮一两	

二诊 痛已略缓，右足拘急，不得屈伸，伸则牵腹中痛，宜芍药甘草汤。